



Majlis Ugama Islam Singapura

Khutbah Jumaat

11 September 2015 / 27 Zulkaedah 1436

Pengajaran Daripada Surah Al-Kahfi

الْحَمْدُ لِلَّهِ الَّذِي أَحَاطَ بِكُلِّ شَيْءٍ عِلْمًا وَقَضَىٰ بِمَا يُرِيدُ حِكْمَةً
وَ حُكْمًا، أَنْعَمَ بِالنِّعَمِ ابْتِلَاءً وَامْتِحَانًا، وَأَشْهَدُ أَنْ لَا إِلَهَ إِلَّا اللَّهُ
وَ حُدَّهُ لَا شَرِيكَ لَهُ ذُو الْجَلَالِ وَالْإِكْرَامِ، وَأَشْهَدُ أَنَّ سَيِّدَنَا
مُحَمَّدًا عَبْدُهُ وَرَسُولُهُ أَفْضَلُ الْأَنْبِيَاءِ وَ مَصْبَاحُ الظَّلَامِ، اللَّهُمَّ
صَلِّ عَلَىٰ سَيِّدِنَا مُحَمَّدٍ وَ عَلَىٰ آلِهِ وَصَحْبِهِ وَسَلِّمْ تَسْلِيمًا
كَثِيرًا. أَمَّا بَعْدُ فَيَا أَيُّهَا النَّاسُ اتَّقُوا اللَّهَ حَيْثُ مَا كُنْتُمْ، فَإِنَّ اللَّهَ
يَعْلَمُ سِرَّكُمْ وَ عَلَانِيَتَكُمْ

Sidang jemaah yang dirahmati Allah,

Marilah kita menyemai takwa kita kepada Allah s.w.t. dengan gigih melaksanakan segala perintah-Nya dan menjauhi larangan-Nya. Takwa menjadi perisai kita untuk menangkis apa jua tarikan kejahatan yang merosak hubungan kita dengan Allah dan hubungan kita sesama makhluk. Semoga ia menjadi cagaran kita untuk mendapatkan kehidupan yang lebih bahagia dan nyaman di akhirat kelak.

Saudaraku,

Sebagai lanjutan bagi khutbah minggu lalu yang mendorong kita untuk membaca dan menghayati isi kandung surah Al-Kahfi. Di antara kisah yang terdapat dalam surah tersebut ialah cerita mengenai beberapa pemuda penghuni gua yang menekankan pentingnya keimanan. Ianya menjadi teladan untuk kita dalam usaha mengukuhkan keimanan pada sesuatu keadaan yang getir. Allah berfirman pada ayat ke 13 dan 14 dari surah Al-Kahfi:

نَحْنُ نَقُصُّ عَلَيْكَ نَبَأَهُم بِالْحَقِّ إِنَّهُمْ فِتْيَةٌ آمَنُوا بِرَبِّهِمْ
وَزِدْنَاهُمْ هُدًى ﴿١٣﴾ وَرَبَطْنَا عَلَى قُلُوبِهِمْ إِذْ قَامُوا
فَقَالُوا رَبُّنَا رَبُّ السَّمَوَاتِ وَالْأَرْضِ لَنْ نَدْعُوا مِنْ دُونِهِ
إِلَهًا لَقَدْ قُلْنَا إِذَا شَطَطًا ﴿١٤﴾

Maksudnya: “Kami ceritakan kisah mereka kepadamu dengan sebenarnya. Sesungguhnya mereka itu adalah pemuda-pemuda yang beriman kepada Tuhan mereka dan Kami tambahkan untuk mereka petunjuk. Dan Kami telah meneguhkan hati mereka pada ketika mereka berdiri lalu mereka berkata: “Tuhan Kami adalah Tuhan langit dan bumi; kami sekali-kali tidak menyeru Tuhan selain Dia. Sesungguhnya kami kalau demikian telah mengucapkan perkataan yang amat jauh daripada kebenaran.”

Saudaraku yang dirahmati Allah,

Pemuda kahfi adalah sekumpulan pemuda yang ditidurkan Allah selama 309 tahun. Mereka berusaha mengekalkan keunggulan iman, kejernihan akal dan ketangkasan bertindak. Mereka berusaha membina daya tahan daripada budaya dan anasir yang samasekali menghalang mereka dari melahirkan keimanan kepada Tuhan yang Maha Esa. Oleh itu Allah melindungi dan memelihara mereka dan Allah lah sebaik-baik Penjaga.

Saudaraku yang dikasihi,

Berdasarkan kisah tersebut, kita digambarkan tentang betapa pentingnya golongan muda di dalam Islam - golongan yang membina iman di atas pemahaman yang tepat lagi berasas, dan golongan yang berdaya tahan dalam membawa perubahan dan mencorak masa depan masyarakat Islam sejalan dengan petunjuk Ilahi. Umumnya, ia menekankan keperluan untuk kita membina generasi muda yang berdaya maju dan melahirkan kesejahteraan hidup, sesuai dengan fitrah insani untuk mencapai keredhaan Allah s.w.t. di dunia dan akhirat.

Nabi Muhammad s.a.w. sendiri sentiasa memberi perhatian terhadap golongan muda dan remaja dalam pendidikannya. Oleh itu saudaraku, membangun generasi muda Islam yang bermutu dan mampu mengharungi cabaran-cabaran terkini amat penting. Ia memerlukan persekitaran yang sihat dan kondusif, agar perkembangan watak, keperibadian dan tingkah

laku mereka yang utuh dapat dibina. Pembangunan dan pengisian rohani, jasmani dan akal hendaknya menjadi teras dalam pemerksaan jati diri generasi muda kita.

Untuk itu, masyarakat seluruhnya bertanggungjawab memastikan anak muda kita dapat menjadikan masyarakatnya sebagai tauladan. Oleh itu, orang dewasa dalam masyarakat perlu terlebih dahulu berusaha menjadi teladan yang baik dan menunjukkan cara menjadi orang yang baik. Sebagai contoh, bagaimana kita boleh mengharapkan anak-anak muda kita taat kepada Allah, Rasulullah s.a.w. dan ibu bapa mereka, jika kita sendiri mendurhakai mereka? Bagaimana kita boleh menginginkan mereka menjadi orang yang berjaya, berakhlak mulia dan bersikap baik, jika perilaku kita sebagai orang dewasa tidak kiralah dalam kehidupan nyata mahupun alam maya internet, menjadi contoh sebaliknya?

Saudaraku,

Dalam mempersiapkan generasi muda kini menghadapi cabaran-cabaran genting, proses pendidikan dan pembudayaan yang sihat adalah kuncinya. Mereka hendaklah menguasai ilmu dan sains yang menggabungkan juga dasar-dasar agama, dan berbentuk bersepadu dan holistik yang menyeru kepada Tauhid. Ilmu yang juga mengajak kepada rasa tawaduk dan merendah diri, bukan kekaguman, keangkuhan dan kedegilan dengan pendapat sendiri.

Sikap peka dalam mengambil rujukan dan mengenali sumber yang berwibawa amat penting, khusus bagi golongan muda, supaya ilmu yang ditimba mampu mengacu pemikiran yang benar. Dengan kesepaduan ilmu inilah dapat membentuk watak yang berdaya tahan, kebal daripada anasir-anasir yang boleh menggelicirkan kita dari jalan yang selamat. Kekuatan-kekuatan yang dibina atas unsur-unsur yang telah dinyatakan, berupaya menelaah keadaan sekeliling dan menzahirkannya dalam bentuk tindakan yang praktis.

Kepada para belia dan generasi muda yang hadir hari ini!

Dalam kita menampilkan sikap beragama kita terhadap sesama Islam dan orang lain, salurkan luahan hati atau pandangan kita dengan penuh bijaksana. Jagalah adab dan hormatilah juga pandangan orang lain yang berbeza dengan kita. Jauhilah sebarang bentuk tindakan yang melampau dan menurut hawa nafsu. Pastikanlah agar anda mendapatkan pendidikan agama secara khusus, dan juga pendidikan rohani daripada mereka yang ingin menjadikan anda pemuda yang lebih baik.

Seharusnya apabila anda lebih banyak mendalami agama, anda menjadi anak yang lebih taat dan sopan, anda menjadi seorang pelajar yang semakin gigih menguasai pelajaran, serta anda menjadi seorang kawan dan jiran yang lebih banyak menabur kebaikan. Jika anda mendapati orang yang menonjolkan keagamaannya tetapi ternyata hanya menanam lebih banyak kebencian dan kemarahan dalam diri anda, atau

membuat anda merasa seolah-olah amat sulit untuk anda menyempurnakan keimanan, maka berhati-hatilah. Apatah lagi jika anda bertemu dengan orang yang mengajar anda untuk mengkafirkan sesama Muslim, maka tinggalkanlah mereka. Allah s.w.t. mengingatkan kita dengan firman-Nya dalam surah Al-Maidah, ayat 77:

قُلْ يَا أَهْلَ الْكِتَابِ لَا تَغْلُوا فِي دِينِكُمْ غَيْرَ الْحَقِّ وَلَا تَتَّبِعُوا أَهْوَاءَ قَوْمٍ قَدْ ضَلُّوا مِنْ قَبْلُ وَأَضَلُّوا كَثِيرًا
وَضَلُّوا عَنْ سَوَاءِ السَّبِيلِ

Maksudnya: *“Katakanlah! Hai Ahli Kitab, janganlah kamu melampau dengan cara tidak benar dalam agama kamu. Dan janganlah kamu mengikuti hawa nafsu orang-orang yang telah sesat dahulunya dan mereka telah menyesatkan kebanyakan (manusia), dan mereka tersesat dari jalan yang lurus.”*

Marilah kita menjunjung ajaran Baginda s.a.w. yang mengajarkan kita nilai kesederhanaan. Dalam membumikan nilai kesederhanaan tidak bermakna kita menggadaikan kebenaran, tidak juga bermaksud untuk memperlekeh agama kita. Tetapi kesederhanaan merupakan *manhaj* Islam pada semua perkara baik dalam beribadah, bermuamalah, cara gaya hidup, tindakan dan penampilan. Pesanan junjungan kita Baginda s.a.w. dengan sabdanya: *“Jauhilah pelampauan dalam agama, kerana binasanya orang-orang sebelum kamu itu*

disebabkan sifat melampau dalam agama.” [Hadith riwayat Ahmad, An-Nasai, Ibn Majah dan Al-Hakim]

Ya Allah, ampunilah segala dosa kami, arahkanlah tumpuan kami dalam melakukan kebaikan. Jadikanlah generasi muda kami menyenangkan hati kami, limpahkanlah hidayah-Mu dalam setiap langkah mereka untuk memartabatkan agama-Mu. Golongkanlah kami bersama hamba-hamba-Mu yang solehin dalam syurga-Mu kelak. Amin. Ya Rabbal ‘Alamin.

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعِنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُودُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.